

Rughju Di Vita

Da i chjassi di sangue è e strade spaventu
Hè partutu u lionu à salutà u ventu
I so cumpagni fieri sò trà pientu è rivolta
Si sò chitate e sfiere, un silenziu s'ascolta
Hè partutu u lionu à salutà u ventu.

Una lacrima hè corsa in l'ochji d'un zitellu
Hè partutu u lionu à salutà u celu
L'anu toltu u fiatu ma hè viva a so voce
U so passu hè stampatu per disertu è per foce
Hè partutu u lionu à salutà u celu.

Di u so rughju arditu ribombenu e fole
Hè partutu u lionu à salutà u sole
Pocu impreme u vantu di quellu chì fù cecu
Suvitendu u so cantu truveremu u veru
Hè partutu u lionu à salutà u sole.

Sò orfagne è zergose e muntagne ribelle
Hè partutu u lionu à salutà e stelle
Issu paese hè di fette è u focu ùn si tace
Ùn sò mai e vindette à fà cresce a pace
Hè partutu u lionu à salutà e stelle.

S'hè accolta a so ghjente in un silenziu piu
Hè partutu u lionu à truvà u so diu
Sia Bibbia o Curanu si sceglie u so destinu
Ùn hè divina a manu à armà l'assassinu
Hè partutu u lionu à truvà u so diu.